

左恪靖侯奏稿初編

恪靖奏稿初編卷三十五目錄

閩省官吏應辦張丙夷務銀兩請免捐習

籌款購買輪船機器請令沈前撫仍督船政捐

陳明酌增省標兵丁折色米價摺

請將傷發身故之副將從優議卹片

徵收起運運銷茶稅未能定毛情形摺

擬辦軍需支收款目總數章程摺

保獎克復鎮平嘉應遠平髮逆出力員弁摺

請給出力洋弁優加守備銜片

初編卷三十五目錄

保獎靈字全軍出力員弁摺

查辦齋教餘匪搜捕事竣地方安謐摺

閩省官吏應攤張丙夷務銀兩請免捐摺

奏爲閩省官吏應攤臺匪張丙逆案並夷務軍需未補銀兩籲懇

天恩免其攤捐恭摺奏祈

聖鑒事竊維設官分職優予養廉原爲辦公有資冀其清操自勵閩省各官養廉自奉文核扣減成減平額領銀數已形短絀加以捐攤之案層見叠出所餘更屬無幾甚有不敷捐扣者現將地方一切陋規禁革淨盡若仍按款捐攤終至虧短正款除外攤各項概予刪除尙

有剿辦臺匪張丙軍需一款應捐銀六十五萬九百九兩六錢零且自道光二十五年五月初一日起截至同治五年七月底止各官廉內已扣銀八萬三千六百七十五兩零未扣銀五十六萬七千二百三十四兩六錢零又辦理夷務軍需一款應捐銀七十五萬三千六百五十八兩三錢零自道光二十八年正月初一日起截至同治五年七月底止已扣銀三萬六千八百八十五兩六錢零未扣銀七十一萬六千七百七十二兩七錢零由署藩司周開錫詳請奏懇免捐前來臣等伏查前

辦海寇蔡牽軍需案內應攤未補銀三十三萬四千餘兩曾於嘉慶二十五年八月二十七日欽奉

宣宗成皇帝恩旨免捐其時

新正特頒羣情感服原以攤捐一事實官吏虧累之由缺分既素有積逋貪廉均無能免累任事一日卽累一日任事一年卽累一年於是有以後數十任代前人賠償虧累者有以虧累太重而營求調劑者有以挪掩而被叅處者有以勒受交代而長屬參商屈抑好官者賢者歎廉吏之不可爲其不肖者且或以虧累太多預料

上司憚於舉發翻得遂其挾持之計吏治衰廢職此之
由閩省軍務甫清正當革除弊政臣等竊維欲恤民必
先恤吏欲行懲貪之令必先察其致累之原所有前項
兩案軍需攤捐共未補銀一百二十八萬四千七兩零
伏懇

聖主逾格鴻慈免予攤捐以示體恤而資整飭謹合
詞恭摺具

奏伏乞

皇太后

皇上聖鑒訓示施行謹

奏
同治五年十月初五日

籌款購買輪船機器請令沈前撫仍管船政摺

奏爲籌撥購買輪船廠機器等件銀兩並請

旨諭令沈葆楨仍接管船政事竊臣前請

簡派前任江西撫臣沈葆楨總理船政當卽抄摺咨請

接辦去後沈葆楨以丁憂人員不應與聞政事具呈固辭引據經義堅不可奪惟思總理船政究與服官不同所履之地並非公署所用之人亦非印委無宴會之事不以素服爲嫌公事交接可用函牘往返不以入公門爲嫌且在籍監造不爲奪情久司船政可待襄嚴親於

忠孝之義究亦兩全無害若以事非金革勿避非宜則此局所關非徒一時一地之計謂義同金革也可謂更重於金革也亦可臣既奉

命西征尅日就道洋員回闕卽須與之要約以便交替非得中外仰望之人擔荷遠猷無以堅遠人之信非遠人信服事難必成不敢輒發巨款交替之際間不容髮復以此商之沈葆楨續准沈葆楨稱如果奉

旨飭令辦理亦必請俟明年六月母喪服闋後始敢任事其未釋服以前遇有咨

奏事件可由署藩司周開錫道員胡光墉詳請督撫
代爲咨

奏臣維製造輪船一事大致已有頭緒德克碑日意格
等於旬日內即可齊來定議應先行備辦之事臣早爲
籌及周開錫胡光墉皆與知之數月以內沈葆楨暫緩
應事尙無不可惟當飭周開錫胡光墉遇事稟承庶接
辦時頭緒了然更期妥善遇有咨奏事件暫由周開錫
胡光墉面稟督撫臣代爲咨

奏庶大局可冀有成而沈葆楨居憂讀禮一事可無遺

議其感荷

朝廷矜全之

恩更當仰如耶應請

旨飭下沈葆楨於服闋後總理船政未任事之先所有船局事宜仍一力主持以繫全望而重要工勿許固辭至購買機器輪機鋼鐵及募雇師匠辛工路費洋將薪水與器具水脚包紮保險等項有須半領者有須全領者共訂關平銀十三萬三千八百六十六兩五錢應先動款應付理合恭摺馳陳伏乞

皇太后

皇上聖鑒訓示施行謹

奏

同治五年十月初八日

陳明酌增省標兵丁折色米價摺

奏爲省標八營兵丁月支折色米價不敷養贍酌籌增給以卹兵艱恭摺奏祈

聖鑒事竊查福建省標八營兵丁應支糧米向按雙月支給本色單月支給折色其應放本色者督標中左右水師四營向係由臺配運來省盤收福州府倉由府移營關支前因暎夷滋事配運維艱

奏明將一半本色之中再改支一半折色每石計折價銀二兩應年秋季八月冬季十二月及度歲米價均由

司給發其餘各月一半本色折米仍發福州府轉給其撫標左右營暨福協左右營軍並軍標各營應支雙月本色向由糧道及閩縣侯官等縣征收糧米項下撥給其單月應支折色每石祇給例價銀九錢向在通省兵餉項下估計內督標四營由司逕發撫標左右營福協左右軍暨軍標各營均向移糧道散給因查例價九錢合市價每米一石不及三分之一實屬不敷養贍現當整頓營伍之際臣等督同署藩司周開錫體察情形非酌籌增給例價實不足以資騰飽而卹兵艱爰酌議白

本年三月初一日爲始凡省標入營應支折色之月均於每米一石折價九錢外另增給銀一兩一錢計每米一石合共折給銀二兩雖於市價尙覺未敷而比較例價已逾一倍以外其加給銀兩不在估餉之內司庫無可籌支當飭暫在稅項下移撥關支統由司庫逕發毋庸解道以省周折所有撫標各營向領例價九錢卽在單月解道米折銀內扣除以免轉轉所有例價及加給銀兩統容俟裁兵加餉章程議定分別查明屬倉本色米石是否足敷撥給應否由司再支折色另行分別

辦理外所有酌籌加給福建省標八營各兵丁米價緣
由據署福建布政使周開賜詳請具

奏前來

臣等覆查無異理合恭摺會

奏伏乞

皇太后

皇上聖鑒故部核覆施行謹

奏

同治五年 月 日

請將傷發身故之副將從優議卹片

再查花翎留浙補用副將張志玉原係湖南河溪營戰

兵委署外委出師各處軍營調撥前署浙江紹興協副將馬德順軍營充當馬隊哨官屢著勞績歷保花翎副將留浙補用該員因從征數載身經百戰積勞成疾給假回籍調治詎於同治四年十二月二十五日因傷復發在籍身故經該故員之子兵丁張光稟由署湖南河溪營都司向雲陞飭補屬實報經兩湖督臣官文咨請查案

奏卹前來伏查該員張志玉自咸豐十一年間由順字營馬隊隨征調浙屢著戰功歷經保獎花翎副將留浙

補用嗣因積勞成疾給假回藉調治茲因傷發身故例
應請

卹相應請

旨俯准將花翎留浙補用副將張志玉交部從優議卹
以慰忠魂謹附片具

奏伏乞

聖鑒

奏
同治五年十月初八日

徵收起運運銷茶稅未能定額情形摺

奏爲閩省徵收起運運銷茶稅銀兩未能定額情形恭摺奏祈

聖鑒事竊案准戶部咨閩省徵收起運運銷兩項茶稅節經奏咨行催酌中定額閩省並未遵辦行令迅速將歷年內地起運運銷茶稅酌核奏請定額等因伏查閩省出產茶葉先僅崇安縣屬之武彝山一帶地方故有武彝山茶之名歷任該縣設官徵稅放行之後有再經過各關者仍令照例輸稅嗣因山西之大同直隸之蔚

州等處盤獲漏稅茶箱案內經前直隸督臣訥爾經額
以福建武彝山茶不許引課商人往來販運官私遵辦
奏請明定章程嗣後商販赴崇安縣收買武彝茶葉完
竣卽由崇安請領執照輸稅以便稽查奉部議准咨閩
遵辦地方隨經查明閩省產茶不僅崇安一處議將建
甯府屬之浦城建陽甌甯建安延平府屬之沙縣邵武
府屬之邵武縣崇安縣共七處各商到地販運茶葉議
請自咸豐二年爲始每茶百斤勅令各該地方官就地
先徵起運稅銀一律由司核給印照頒發各縣填給各

商收執販運並明定章程通飭各屬遵辦所徵稅銀解
司報部奏明俟試徵一二年後再行定額此征收起運
茶稅之定章也又運銷一項因粵逆竄擾江楚茶販不
前奏准暫弛海禁因而商民取巧販茶多由海道運往
各處不復由輸稅各關經過以致關稅漸短議在附省
扼要處所添設關卡加增稅課請自咸豐五年爲始在
古田縣屬之水口俟官縣屬之北嶺設關啟征運銷茶
稅專款解存司庫留支本省兵餉亦經聲明俟試征一
二年後再行定額此徵收運銷茶稅之定章也溯自抽

收以來已逾試征之期如可酌中定額自應照案辦理
惟查閩省產茶多在荒僻之地日久採植菁華勢必日
歇而行銷又以外洋商販爲大宗每年春間新茶初到
省垣洋商昂價收買以廣招徠迨茶船擁至則價值頓
減茶箱往往虧折資本加以浙江廣東九江漢口各處
洋商茶棧林立輪船信息最速何處便宜卽向何處售
買故閩茶必專恃洋商而洋商不專恃閩茶此皆茶租
盈絀所繫從前請試辦二三年再行定額者蓋未熟籌
及此也現查閩省啓運茶稅自咸豐三年儀征起是年

計收八千七百餘兩四年分收一萬五千兩零五年分
收一萬三千六百餘兩六年分收一萬三千二百餘兩
七年分收二萬零二百餘兩八年分收一萬二千數百
餘兩九年分收一萬二千八百餘兩十年分收二萬二
千六百餘兩十一年分收五千九百餘兩零同治元年
分收一萬二千九百餘兩二年分收三萬八千三百餘
兩三年分收一萬八千三百餘兩四年正二兩月收二
百五十餘兩運銷茶稅自咸豐五年起是年收三萬二
千一百餘兩六年分收十五萬二千三百餘兩七年分

收十五萬九千六百餘兩八年分收十一萬六百餘兩
九年分收十七萬九千餘兩十年分收二十三萬八千
五百餘兩十一年分收二十一萬六千二百餘兩同治
元年分收二十四萬三千七百餘兩二年分收二十一
萬三千六百餘兩三年分收二十一萬七千餘兩欲折
其中而多寡既有參差欲定爲額而徵收實無把握理
財之道首在得人從前地方官承辦間爲差胥朦蔽難
期涓滴歸公今改歸局辦委員征收核實報解計自同
治四年三月起截至年底止共征起運稅銀三萬七千

三百餘兩運銷稅銀二十一萬三千一百餘兩實已稍有起色然產茶之衰旺無常故征稅之盈絀難定若從少定額或後來征收較多恐啟侵蝕之漸若從多定額或後來征收較少實無賠墊之方臣等與在省司道悉心核議所有前項起運運銷茶稅礙難議設定額卽由該司道督飭各局委員認真稽察實力抽收儘征儘解仍於年終將所收數目據實詳細造冊咨部稽核外永以爲例似不至有流弊也據稅釐局司道具詳請奏前來除咨明戶部外臣等謹合詞恭摺具奏伏乞

皇太后

皇上聖鑒訓示謹

奏 同治五年十月初八日

擬辦軍需支收款目總數章程摺

奏爲遵

旨開報同治三年六月以前軍需支收款目總數先將
擬辦章程恭摺會奏仰祈

聖鑒事竊照同治三年八月初五日承准議政王軍機
大臣字寄同治三年七月初十日奉

上諭同治三年六月以前各處辦理軍務未經報銷之
案准將收支款目總數分起開具簡明清單奏明存案
免其造冊報銷此係朝廷破格施恩各路統兵大臣各

省督撫具有天良務須督飭根查委員核實開報不得
因有此旨任意影射浮冒並補嚴禁勸捐歸補名目及
私設釐卡等弊如有不肖委員仍以前項情弊巧爲營
試別經被覺除將承辦各員嚴辦外必將各該統兵大
臣及各該省督撫從重治罪部中書吏如有在各處招
搖撞騙朦混包攬者並着嚴行拿辦以懲奸蠹其自本
年七月起一應軍需凡有例可循者務當遵例支發力
求撙節其例所不及有應酌量變通者先須奏咨備案
事竣之日一體造冊報銷不得以此次特恩妄生希冀

將此通諭中外知之欽此又准戶部咨

欽奉

上諭所有同治三年六月以前各處軍需用款准照新章奏報者有統兵大臣實成統兵大臣無統兵大臣省分實成該督撫辦理各省鉅萬軍需用該大臣督撫一言而定倘有不實不盡之處必唯該大臣督撫是問其開單存案者事屬創始其中款目繁多應如何分年分起核實開報之處着該大臣督撫等各就實在情形先行妥議章程具奏如有吏胥人等在外藉端撞騙者着

滇遵前奉諭旨嚴行查拿從重懲辦等因欽此欽遵移行遵辦去後時值粵逆竄陷漳龍等郡縣地方軍事旁午未能兼顧將軍需報銷及一切有關例限事件咨部展緩辦理迨軍務肅清復經咨明於四年十一月初一日一律起辦一面檄飭省局司道上緊釐查開報飭據署藩司周開錫暨軍需局司道詳請派令已革藩司張餘慶會督局員核實查辦去後嗣據會同議詳閩省自咸豐二年起先後徵調官兵赴援各省並本省會匪連年滋事加以粵逆竄次竄擾閩疆十年以後與援剿浙

省點逆計截至同治三年六月止十餘年中無歲不有
軍務所有動用軍需內由司局核發者均係隨時詳明
開支其由統兵大員隨營支用併各府州縣辦理防剿
供應過境夫糧等項已據造冊送局者亦經隨時核實
查銷稍有浮開卽嚴行刪減均有前後局司道核銷案
據可稽惟歷時既久款目紛繁且帶兵及辦防各員多
有陣亡事故未據冊報以及地方失守緊卷無存無可
追查者清釐非易閩省著名瘠區自前升任藩司慶端
咸豐六年交代以後司庫厯有長用並無存銀遇有急

需均係隨時設法籌措或以各項印票權宜借用續於捐輸等項搭繳歸還又自六年以後司庫日形支絀不能分起開支款目更爲糾轉前經奏請將截至九年二月止內地動用軍需及臺灣初次剿匪分作五案造銷仍以軍務類仍未克造報茲於上年十一月起督飭局員調集檔冊逐起釐查內咸豐三年起至六年二月止又自六年三月起至九年底止剿辦粵匪土匪各案各屬均係歸併開報省局亦係一併核銷難以細爲分晰應請將歷年赴外省及本省防剿粵匪土匪各案自咸

豐三年起至六年二月止作爲第一案六年三月至九
年底止爲第二案十年至十一年底止爲第三案同治
元年至三年六月底止爲第四案又咸豐十年起至同
治二年止援浙爲一案咸豐三年初次剿臺匪林供等
爲一案以上六案均截清年月將分起支應總數核實
開報尙有同治元年二次剿匪辦臺匪戴萬生一案臺
屬支用軍需款目尙未造冊呈送所有內地支給援臺
官弁鹽糧及沿海各屬辦理防堵供應過境官軍等項
應請附入內地四次剿匪案內彙銷仍先將同治元年

二年內地撥解剿辦臺匪軍餉銀兩附報又查捐輸局
軍餉案內經前撫督臣奏明提撥三成爲各屬地方團
練經費各屬勸辦此案捐輸均係按捐數以二成扣撥
所屬紳董承辦該紳董支用辦團款目現雖未據造冊
呈送所給二成銀數應與支發上游延平府屬護商經
費銀兩先行彙報又奉部奏撥各省協餉司道係歸於
剿匪款內動支並請照案一併開報所有六案軍需支
用款自於咸豐九年以前係照前辦臺匪張丙及防夷
軍需辦理十年以後係照浙省移抄章程酌辦於咸豐

十年列款

奏明有案尙有事所必需前奏未及之款誠如部奏變通因時又不能悉遵之處閩省通營向無公費等項名目堪以撥用向來均係據實開報於造銷時照例辦理現蒙

恩施逾格免其按例造報應將一切實用款數據實開呈其各案內有帶兵辦防陣亡人員未據造報者雖各該員支用無非兵餉夫糧等項現既未據分款冊報未便虛懸開造應核明司庫屬庫撥用銀兩確有報案可

稽者各歸各案據實開列以歸核實其各案收款自司庫以至屬庫前後相雜委難逐案劃清應請統行開報屬庫動用款目已據指款造報者均照屬冊一體查開其統報交代各款及未據指報款目者均列於墊用項下俟飭屬查明原挪係三年六月以前款項准其支抵另行造冊咨部並於原挪各員結報交代案內歸案咨銷概不准請抵三年七月以後收款此外如尚有長餘亦毋庸再行給領以上收支款目擬彙開四柱簡明清單並收支款目另造清冊分送軍機處戶部備查並據

聲明此案分年分起辦理章程實因閩省庫款糾紛非
通盤清釐難以憑空擬議以致請奏稽查等情前來臣
等覆查該司道所核歷年軍需支用情形委皆屬實據
請將六案軍需支款總數截清年月分起開報並將撥
解協餉等項附報之處尙屬妥協至閩省以著名瘠苦
之區徵兵籌餉十有餘年支應餉需之浩繁與歷來庫
款之短絀均經前督撫臣暨臣等縷晰
奏陳早在

聖明洞鑒之中計自軍興以後司庫屬庫正雜各款以

及捐需釐稅等項除年例動支之外無不盡歸軍需動
用遇有急需尙藉各項印票通融濟應庫欸並無餘剩
今將已用欸目據實開報其各屬挪動交代庫欸報明
確有案據現未指欸開報者唯三年六月以前欸目准
其查明支抵則以後庫欸亦無虞影射牽混卽不致有
浮銷之弊至於勸捐歸補閩省厯辦軍需並無此等名
目亦無私設釐卡及書吏招搖等弊仍嚴行訪察查出
卽從重懲辦斷不敢稍事姑容並予嚴譴除督飭該司
道繕具清單另行奏咨外謹將擬辦章程先合詞恭摺

奏陳伏乞

皇太后

皇上聖鑒訓示謹

奏同治五年十月初八日

保獎克復鎮平嘉應湯平髮逆出力員弁摺

奏爲遵將閩軍越境克復廣東鎮平縣城及嘉應塔子
輿大捷殲除首逆收復州城賊剿殲賊髮逆全股湯平
出力員弁彙案保獎恭摺

奏祈

聖鑒事竊臣欽奉同治四年九月十五日

上諭左宗棠等奏官軍克復鎮平追剿殲賊大獲勝仗
一摺此次出力各員弁着左宗棠等彙案擇尤保獎以
示鼓勵欽此又奉五年正月十五日

上諭左宗棠等奏官軍進迫嘉應東路痛剿撲壘賊匪
大獲勝仗首逆伏誅一摺其餘在事出力員弁着在田
左宗棠存記纂案保獎候旨施恩欽此又奉五年正月
二十三日

上諭劉坤一奏江西各軍剿賊大勝嘉應餘匪棄城宵
遁本日復據左宗棠瑞麟郭嵩焘奏截剿賊匪連獲大
捷餘匪盪平各一摺其餘在事出力各員弁着左宗棠
查明擇尤纂案保獎候旨施恩欽此伏查閩省各軍自
克復漳龍各城分道截剿追至武平連獲大捷聞賊一

律肅清汪逆竄踞廣東鎮平縣城高連陞黃少春劉清
亮王德榜康國器等越境馳剿汪逆圖犯閩邊各壘竄
越江西另謀生路閩軍堅扼其東北迭次截剿獲勝賊
屢被創憚不敢前高連陞黃少春等進紮分水坳攻克
白泥湖賊壘康國器等督隊分攻石古排對門營白果山
各賊壘遂克鎮平沿途追剿賊之由西南竄者一蹙之
於東石再蹙之於大柘賊畏官軍追急復改趨興甯又
折北向長甯奔突閩軍先駐江境之王開琳所部復蹙
之於小山墟賊由長甯橫出龍南定南邊界圖犯南安

江軍擊之遂由定南敗竄廣東連平所轄上下坪一帶分擾龍南始興其狡謀詭計仍思奪踞竄江西湖南邊界由湖南廣西入蜀尋石逆覆轍也劉典一軍駐汀州以援江西旋出隊至武平助剿比恐賊由興甯和平竄南雄爲江西湖南邊患令劉典所部出江西安遠信豐急趨南安進紮廣東南雄爲攔截之師力遏其前突之路高連陞劉清亮扼其內犯廣東之路黃少春繼劉典進發駐紮信豐扼其旁竄江西之路賊見去路悉斷由連平翻山狂竄和平興甯繞越康國器營壘突陷嘉應

計汪逆一股自鎮平竄逸者尙十萬人雖迭被截殺而
選軍叛勇及惠潮嘉土匪又附益之眾約十餘萬勢且
復張闔軍先後出境者將三萬人臣僅帶親兵八百駐
漳奏

命節制三省軍務入粵督剿調總兵楊和貴一營隨行
出屯琯溪由平和出廣東大埔劉典黃少春王德榜先
後率隊來會定合圍之計高連陞康國器亦馳抵嘉應
東北賊偵知官軍將合長阻亟欲遁去而兵來神速東
北面均已壓境乃於鳳寨決一死戰旣不得逞官軍層

遞進迫汪逆遂傾巢出撲塔子與新營鏖戰竟日殲厥渠魁賊膽益落閩軍待鮑超至西北粵軍延紮西南遂日夜滾營壓城而壘譚逆胡逆亟謀突圍由南路銑走乘虛竄犯閩疆復入江皖潮匪又相與勾引因衝過粵軍營壘徑奔黃砂嶂官軍晝夜邀截四路兜擒未及三日而剿殺受降髮逆遂無遺種十餘年通誅巨寇無一漏網計自鎮平之役閩軍窮追六晝夜足不停趾自是而逆頭攔截銜尾躡追倍道回攻各軍馳驅嶺嶠往復二千餘里抵嘉應後將士一心戮力圍剿兩月之間將

汪逆大股悍賊悉數掃除仰賴

皇上天威得以速蒞軍事東南數省一體解嚴而其中
奔馳之勞瘁搏鬪之堅苦轉運之奇艱尤爲久處行間
者所罕覩在事文武實屬奮勉異常未可掩抑臣奏
恩旨獎勵恭錄行知各營茲據開摺彙案請獎前來臣
逐加覆核雖所保人數稍多然實係克復鎮平及嘉應
塔子壘大捷殲除首逆收復州城遺孽盪平並節次打
仗獲勝在事尤爲出力水陸馬步共七十營出境後大
小數十戰三次欽奉

恩旨准保並謹併歸一案彙獎未便過予核減至此大
合三省兵力殲除髮逆閩軍戰事最多所保文員其隨
營打仗者勞烈固倍於往常卽辦理轉運各員亦非尋
常勞績可比間有從優保獎與部定章程不符者實係
軍中必不可少之人員合無仰懇

天恩敕部免于核駁庶勵志功名者感而益奮矣除記
保以藍翎千總把總外委拔補者咨部註冊外其文職
各員亦分別填註考語一併開列清單恭呈

御覽伏乞

皇太后

皇上恩准獎勵以示激勵再此案所保均係

微臣所部

越境隨剿員弁故未曾同廣東督撫

臣福建巡撫臣具

奏合併聲明謹

奏 同治五年 月 日

請將出力洋弁優加守備銜片

再藍翎六品軍功洋弁華阿哩隨營帶隊打仗出力並
製造洋礮以資攻剿奮勉異常該洋弁久遵中國服色
熟習官話應請

賞加守備銜以示優異而昭鼓勵謹附片具

奏伏乞

聖鑒施行謹

奏

保獎霆字全軍出力員弁摺

奏爲遵辦浙江提臣霆字全軍進紮嘉應平成鋪大獲
勝仗及收復州城追剿匪賊餘孽盡平出力員弁彙案
保獎恭摺

奏祈

聖鑒事竊照浙江提臣鮑超一軍由江西會剿嘉應踞
逆於四年十二月十七日馳抵嘉應州西北之相公亭
十九日進紮平成鋪首逆譚體元胡瞎子等正因汪逆
伏誅驚惶失措後經鮑超督隊痛剿大獲勝仗二十二

夜賊由水南竄黃砂嶂閩軍躡蹤緊追沿途截剿鮑超
繼至與高連陞等合力掩捕髮逆全數殲平欽奉

恩旨獎勵當卽恭錄咨行茲據鮑超咨送清單請獎前
來臣於是役與鮑超會師未及一旬所部各員戰功未
能深悉除文職各員鮑超原單概未出具者語臣更無
從註考未便率行保獎外所有武職員弁逐加覆核雖
人數較多究係行陣出力之員當此巨寇悉平東南一
律肅清合無仰懇

天恩俯准照單給獎以示激勸出自

皇上逾格鴻施除記保以藍翎千總把總外委拔補者
咨部註冊外謹將提臣鮑超所部武職員弁開列清單
恭呈

御覽伏乞

皇太后

皇上聖鑒施行謹

奏

查辦齋教餘匪搜捕事竣地方安謐摺

奏爲查辦崇安齋教餘匪搜緝事竣地方安謐恭摺會
奏仰祈

聖鑒事竊本年二月間江西齋匪勾結崇安北鄉齋匪
突陷縣城竄擾建陽經臣等檄飭留浙知府張樹葵由
建平進剿咨署浙江提臣黃少春由邵武迎截浹辰之
間兩城收復黃少春所部追至江西鉛山縣屬石塘地
方將餘匪悉數撲滅張樹葵留駐崇安搜剿餘匪除捕
斬匪首陳奴奴等七犯業經專摺

奏報外續獲謀逆戕官匪首安坎孫及匪犯張龍闕芳
秋彭普孫余學永林保孫衷舍弟衷坤陳削削林老仔
萬正但左進寶彭寶林林連壽林盛仔孟袁倪細弟汪
貴貴趙星彭弟寶劉弟仔黃鳳仔黃敬孫彭德光李小
肝黃老盛王初仔安三弟彭五仔童角仔毛大弟彭惠
孫吳占標余錦春吳弟騾馬留興周流流楊錫清彭妹
仔王婢婢衷貴孫周幗汰彭紹弟張春茂毛金孫等四
十五犯並獲造作謠言乘機搶掠之游勇陳文魁陳得
勝吳弟等三名又會同分駐崇安之署建甯左營游擊

朱光斗查拿通逆內應之革兵彭元標吳占標裴占興
袁元標范占榮周海亮章鳳高等七名並派游擊賀定
貴守備陳緯高帶隊越境搜捕至江西封禁山九井地
方拿獲僞護將留寶寶一犯均經訊明就地正法分別
梟示以昭炯戒將口團董拿獲僞先鋒徐雪孫一犯前
代理建甯府知府周星貽督飭建陽縣營頭巡檢黃永
錫緝獲焚搶燈局之黃奶波劉光奴二犯當飭訊明誅
沿閩境一律肅清伏查此股齋匪先在封禁山潛聚灌
入閩邊勾結滋事據黃少春張樹葵擒獲逆匪僉供首

匪胡老大胡老三江西南昌府人家距府城四十里在
家爲匪不法房屋被焚逃至鉛山石溪空口排樓前破
屋內居住大渾石塘諸戰該逆兄弟曾否殲斃無從查
悉比卽飛咨江西撫臣派隊搜山聞軍隨時會緝近聞
鉛山茅排有土匪戕官之事難保非餘孽潛萌昨接江
西撫臣劉坤一緘稱該處土匪已爲練勇所殲漏網無
幾並親入封禁山履勘情形餘屬編查戶口田土等語
當可一清淵藪上慰

宸厪閩省崇安一帶茲已搜剔無遺其餘各屬間有持

齋之輩並無匪蹟自未便株連究治操之過嚴現飭留防各營將弁於捕治土匪之次細加偵察總期無擾無縱久可化莠爲良庶仰副我

皇上仁育義正之至意擬保道銜留浙知府張樹莪前聞崇安警信不俟齊隊卽率三百人冒雨馳抵建甯郡城人心賴以安戢收復建陽崇安實有勞績且久駐延平捕治上府土匪深爲得力應請優獎以示鼓勵該員於克復浙江湖州等城案內以剿賊出力經臣宗棠奏保以知府留浙不論繁簡遇缺卽補部議駁令另核

請獎查核該員以刑部員外郎奉

旨引

臣特發浙江交臣宗棠差遣京員在外出力既不能保

升京秩以升階留於

特旨發往之省又卽在該省出力似與尋常保免補留
省者不同且該員隨同剿賊實屬勞績異常應請

勅部准照原保以知府留浙不論繁簡遇缺卽補並

賞戴花翎所部尤爲出力之花翎叅將銜儘先游擊賀
定貴請以叅將儘先補用並

賞加副將銜藍翎都司周鏡清請以游擊儘先補用並請

賞換花翎花翎游擊銜都司栗龍山請以游擊補用並賞加叅將銜藍翎守備張德勝請以都司留浙遇缺卽補並

賞換花翎花翎守備陳締高卽連政藍翎守備劉三元均請以都司儘先補用陳締高卽連政並

賞加游擊銜劉三元並請

賞換花翎其餘在事出力員弁暨黃少春所部各員弁

容像彙入治匪案內保獎謹合詞恭摺具

奏伏乞

皇太后

皇上聖鑒訓示施行謹

奏
同治五年十月初十日